

Tomislavgrad, 04.02.2014. godine
Broj: 50/14

ZAPISNIK I ZAKLJUČCI
SA ČETVIRTE SJEDNICE PREDSJEDNIŠTVA SKUPŠTINE
SAVEZA OPĆINA I GRADOVA FEDERACIJE BIH

U Općini Tomislavgrad je dana 04.02.2014. godine održana Četvrta sjednica Predsjedništva Skupštine Saveza općina i gradova Federacije Bosne i Hercegovine (u daljem tekstu: Predsjedništvo Saveza).

Sjednici Predsjedništva Saveza prisustvovali su:

1. **g-din Husejin Smajlović**, načelnik Općine Zenica, predsjednik Predsjedništva Saveza
2. **g-din Edin Smajić**, načelnik Općine Vogošća
3. **g-din Agan Bunić**, načelnik Općine Bužim
4. **g-din Emir Bubalo**, načelnik Općine Konjic
5. **g-din Rasim Omerović**, načelnik Općine Kalesija
6. **g-din Željko Josić**, načelnik Općine Domaljevac-Šamac
7. **g-din Ivan Vukadin**, načelnik Općine Tomislavgrad
8. **g-din Nedžad Koldžo**, načelnik Općine Novo Sarajevo
9. **g-din Asim Mekić**, načelnik Općine Busovača
10. **g-đa Amra Babić**, načelnica Općine Visoko
11. **g-din Srećko Mikulić**, po ovlaštenju načelnika Općine Grude

Pored gore navedenih, sjednici su prisustvovali i: **g-đa Vildana Smajović**, Sekretar jedinstvenog općinskog organa uprave Općine Novo Sarajevo, **g-đa Aida Laković Hošo**, UNDP, voditeljica Projekta integriranog lokalnog razvoja – ILDP, **g-dica Marina Dimova**, UNDP, Governance Advisor, **g-din Nijaz Avdukić**, pomoćnik direktora Federalnog zavoda za programiranje razvoja, **g-đa Vesna Travljanin**, direktor Saveza, **g-đa Zlata Turkić**, viši saradnik za rad sa skupštinskim komisijama i institucijama vlasti, **g-đa Šejla Hasić**, viši saradnik za projekte – projekt menadžer, **g-din Amir Kupusija**, viši saradnik za informisanje i odnose sa javnošću, **g-đa Elvira Imširović-Bolić**, viši saradnik za pravna pitanja i **g-đa Selma Fišek**, viši saradnik za pravna pitanja.

G-din Husejin Smajlović pozdravlja prisutne i otvara Četvrtu sjednicu Predsjedništva Saveza.

G-din Ivan Vukadin u ime domaćina sjednice pozdravlja prisutne i zahvaljuje se na dolasku.

G-din Husejin Smajlović predlaže Dnevni red kako slijedi:

1. Zapisnik i Zaključci sa Treće sjednice Predsjedništva Skupštine Saveza općina i gradova Federacije Bosne i Hercegovine
2. Zabilješka sa zajedničke sjednice Komisije za ekonomski razvoj općina i gradova i finansije, Komisije za ustavna i zakonodavna pitanja, Komisije za razvoj i unapređenje lokalne samouprave i Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša

- Izvjestilac: Zlata Turkić, viši saradnik za rad sa skupštinskim komisijama i institucijama vlasti
3. Aktivnosti Saveza na projektima:
 - a) Projekat „Načelnici za razvoj lokalne samouprave“
Izvjestilac: Amir Kupusija, viši saradnik za informisanje i odnose sa javnošću
 - b) Projekat energetska efikasnost
Izvjestilac: Amir Kupusija, viši saradnik za informisanje i odnose sa javnošću
 - c) Projekat Beacon Plus
Izvjestilac: Amir Kupusija, viši saradnik za informisanje i odnose sa javnošću
 - d) OSCE – AMCS projekat – Informacije o implementiranim aktivnostima
Izvjestilac: Šejla Hasić, viši saradnik za projekte – projekt menadžer
 - e) IFC – Projekat mikrofinansiranja u Bosni i Hercegovini
Izvjestilac: Šejla Hasić, viši saradnik za projekte – projekt menadžer
 - f) Projekat “Podrška jačanju lokalne samouprave FBiH u pružanju efektivnijih i efikasnijih usluga” koji se implementira u saradnji sa UNDP-om:
 - f 1) Projekat „Jačanje lokalne demokratije/demokracije III – LOD III“
Izvjestilac: Elvira Imširović-Bolić, viši saradnik za pravna pitanja
 - f 2) Projekat „Sistem obuke za jedinice lokalne samouprave – MTS“
Izvjestilac: Šejla Hasić, viši saradnik za projekte – projekt menadžer
 - f 3) „Projekat integriranog lokalnog razvoja – ILDP“
Izvjestilac: Zlata Turkić, viši saradnik za rad sa skupštinskim komisijama i institucijama vlasti
 - g) Inicijativa za promovisanje važnosti i ključnih sadržaja principa odgovornosti, otvorenosti i čestitosti kao najvažnijih stubova dobrog upravljanja
Izvjestilac: Slobodanka Dukić, Razvojna agencija EDA Banja Luka
 4. Pitanje statusa Grada Sarajeva u Predsjedništvu Skupštine Saveza općina i gradova Federacije BiH
Izvjestilac: Vesna Travljanin, direktor Saveza
 5. Informacije:
 - a) Informacija i zaključci sa Seminara na temu: “Primjena Zakona o stvarnim pravima Federacije Bosne i Hercegovine i prednacrt Zakona o premjeru i registraciji nekretnina Federacije Bosne i Hercegovine“
Izvjestilac: Selma Fišek, viši saradnik za pravna pitanja
 - b) Informacija o Zakonu o zaštiti i dobrobiti životinja
Izvjestilac: Elvira Imširović-Bolić, viši saradnik za pravna pitanja
 - c) Informacija o naprednom međunarodnom treningu posvećenom izgradnji kapaciteta žena političarki na lokalnom nivou
Izvjestilac: Vesna Travljanin, direktor Saveza
 6. Tekuća pitanja
 - a) Aktivnosti s ciljem predstavljanja BiH uoči preuzimanja njenog predsjedavanja Komitetom ministara Vijeća Evrope početkom 2015. godine
Izvjestilac: Vesna Travljanin, direktor Saveza
 - b) Generalna skupština NALAS –a
Izvjestilac: Vesna Travljanin, direktor Saveza

G-din Emir Bubalo predlaže da se Dnevni red proširi sa Inicijativom za izmjenu Zakona o električnoj energiji.

G-din Nedžad Koldžo predlaže za proširenje Dnevnog reda Inicijativu za izmjene i dopune Zakona o plaćama i naknadama u organima vlasti Federacije Bosne i Hercegovine.

G-din Husejin Smajlović konstatuje da je Dnevni red jednoglasno usvojen uz predložene dopune.

1. Zapisnik i Zaključci sa Treće sjednice Predsjedništva Skupštine Saveza općina i gradova Federacije Bosne i Hercegovine

G-din Husejin Smajlović otvara raspravu, konstatuje da nema komentara, te stavlja Zapisnik i zaključke na glasanje.

Zapisnik i zaključci sa Treće sjednice Predsjedništva Skupštine Saveza općina i gradova Federacije Bosne i Hercegovine su jednoglasno usvojeni.

2. Zabilješka sa zajedničke sjednice Komisije za ekonomski razvoj općina i gradova i finansije, Komisije za ustavna i zakonodavna pitanja, Komisije za razvoj i unapređenje lokalne samouprave i Komisije za imovinska pitanja, prostorno uređenje, stambeno-komunalne djelatnosti i zaštitu životnog okoliša

G-đa Zlata Turkić naglašava da su na sjednici prisutni i predstavnici UNDP-a i predstavnik Federalnog zavoda za programiranje razvoja.

G-din Husejin Smajlović navodi da će se Predsjedništvo Saveza izjašnjavati pojedinačno o svakoj od tačaka Dnevnog reda sa zajedničke sjednice komisija.

1. Nacrt Zakona o lokalnoj samoupravi Bosansko-podrinjskog kantona

G-din Emir Bubalo smatra da ne treba donositi kantonalne zakone.

G-din Nedžad Koldžo naglašava da treba insistirati na implementaciji Zakona o principima lokalne samouprave u Federaciji Bosne i Hercegovine.

Predsjedništvo Saveza je jednoglasno usvojilo sljedeće zaključke:

- **Nacrt Zakona o lokalnoj samoupravi Bosansko-podrinjskog kantona predstavlja dobru osnovu za izradu Prijedloga zakona;**
- **U prijedlog zakona obavezno ugraditi primjedbe iz lokalnih zajednica;**
- **Prijedlog zakona treba sačekati donošenje izmjena i dopuna Zakona o principima lokalne samouprave u Federaciji Bosne i Hercegovine.**

2. Radni materijal Zakona o razvojnom planiranju i upravljanju razvojem u Federaciji Bosne i Hercegovine

G-din Nijaz Avdukić zahvaljuje na konkretnim primjedbama iz općina na Radni materijal Zakona o razvojnom planiranju i upravljanju razvojem u Federaciji Bosne i Hercegovine, te ističe da su iste u najvećem dijelu i prihvaćene. Naglašava da se nada da će dobiti podršku za daljnje aktivnosti.

G-din Srećko Mikulić postavlja pitanje koji je slijedeći korak.

G-din Nijaz Avdukić naglašava da je slijedeća aktivnost održavanje javnih rasprava nakon čega će biti utvrđen Nacrt zakona o razvojnom planiranju i upravljanju razvojem u Federaciji Bosne i Hercegovine.

Predsjedništvo Saveza je jednoglasno usvojilo slijedeće zaključke:

- **Radni materijal Zakona o razvojnom planiranju i upravljanju razvojem u Federaciji Bosne i Hercegovine se podržava kao dobra osnova za izradu Nacrta Zakona;**
- **O Nacrtu zakona o razvojnom planiranju i upravljanju razvojem u Federaciji Bosne i Hercegovine održati javnu raspravu u kantonima i jedinicama lokalne samouprave.**

3. Inicijativa Općine Ilidža o donošenju Zakona o javnim ustanovama

Predsjedništvo Saveza je jednoglasno podržalo Inicijativu Općine Ilidža o donošenju Zakona o javnim ustanovama.

4. Inicijativa Općine Bosanski Petrovac o osnivanju Šumsko-privrednog društva na području Općine Bosanski Petrovac

Predsjedništvo Saveza je jednoglasno podržalo Inicijativu Općine Bosanski Petrovac o osnivanju Šumsko-privrednog društva na području Općine Bosanski Petrovac uz zaključak da se ista uputi Vladi Unsko-sanskog kantona (Ministarstvu poljoprivrede, vodoprivrede i šumarstva).

5. Inicijativa grada/općina Mostar, Konjic, Jablanica, Čapljina, Prozor-Rama, Grude, Široki Brijeg i Tomislavgrad o izradi Prednacrta zakona o izdvajanju i usmjeravanju dijela prihoda poduzeća ostvarenog korištenjem hidroakumulacionih objekata i Deklaracija Općine Konjic

G-din Ivan Vukadin obrazlaže Inicijativu grada/općina Mostar, Konjic, Jablanica, Čapljina, Prozor-Rama, Grude, Široki Brijeg i Tomislavgrad o izradi Prednacrta zakona o izdvajanju i usmjeravanju dijela prihoda poduzeća ostvarenog korištenjem hidroakumulacionih objekata. Ističe da je postignut dogovor da se potpiše deklaracija. Naglašava da od Buškog jezera dobivaju 7 puta manju naknadu od Rame. Navodi da su tražili od Parlamenta Federacije BiH da se posebnim zakonom tretira naknada za potopljenu površinu kada je u pitanju Buško jezero. Ističe da je cilj da se vrate na prijeratni zakon.

G-din Emir Bubalo naglašava da je osnova ovog prednacrta principijelno dobra, te ističe da je potrebno izbaciti dvije „vrste“ voda iz teksta prednacrta, i to: industrijsku vodu i vodu za piće.

Predsjedništvo Saveza je usvojilo slijedeće zaključke:

- **U Nacrtu zakona o izdvajanju i usmjeravanju dijela prihoda poduzeća ostvarenog korištenjem hidroakumulacionih objekata ne tretirati dvije vrste voda (industrijska voda i voda za piće);**
- **U Nacrt zakona obavezno dodati član 4a koji glasi:**

„4a

(1) Izuzetak za obračunavanje po predhodnom članu je akumulacija Buško blato čiju osnovicu za obračunavanje naknade iz člana 1. ovog zakona čini ukupna površina zemljišta potopljenog hidroakumulacijom pri maksimalnoj koti uspora i ukupna vode koju može da primi hidroakumulacija na osnovu investiciono-tehničke dokumentacije.

(2) Pod zemljištem iz stava 1. ovog člana podrazumijeva se i zemljište na kojem su izgrađeni kanali kojima se dovodi voda u hidroakumulaciju ili odvodi voda iz

hidroakumulacije.

(3) Visina godišnje naknade iz člana 1. ovog zakona iznosi:

- 0,188 konvertibilnih maraka po 1m² (0,188 KM/ m²) zemljišta potopljenog hidroakumulacijom i

- 0,019 konvertibilnih maraka po 1m³ (0,019 KM/m³) vode koju može da primi hidroakumulacija.

(4) Visina naknade iz stava 3. ovog člana usklađuje se svake godine, srazmjerno promjeni cijena električne energije na pragu prenosa u prethodnoj godini.

(5) Usklađivanje iz stava 4. ovog člana primjenjuje se od 1. januara svake godine“.

6. Inicijativa Općine Prozor-Rama za izmjenu Odluke o osnivanju lovišta u Hercegovačko-neretvanskom kantonu

G-din Rasim Omerović naglašava da je jedino moguće da na području jedne općine postoji jedno lovište.

G-din Asim Mekić ističe da on lično podržava ovu inicijativu, ali da smatra da će se pojaviti puno ovakvih zahtjeva, te da se ipak treba voditi računa o nekim prirodnim granicama.

Predsjedništvo Saveza je jednoglasno podržalo Inicijativu Općine Prozor-Rama za izmjenu Odluke o osnivanju lovišta u Hercegovačko-neretvanskom kantonu.

7 a) Imenovanje člana Interresorne komisije za izradu nacrtu Strateškog plana ruralnog razvoja Bosne i Hercegovine pri Tehničkom timu za upravljanje poljoprivrednim zemljištem Ministarstva vanjske trgovine i ekonomskih odnosa Bosne i Hercegovine

Predsjedništvo Saveza je jednoglasno usvojilo prijedlog komisija Skupštine Saveza općina i gradova Federacije BiH da se za člana Interresorne komisije za izradu nacrtu Strateškog plana ruralnog razvoja Bosne i Hercegovine pri Tehničkom timu za upravljanje poljoprivrednim zemljištem Ministarstva vanjske trgovine i ekonomskih odnosa Bosne i Hercegovine imenuje gospodin Began Muhić, Općina Živinice.

7 b) Inicijativa Općine Vogošća vezana za problematiku statističkih podataka koja se odnosi na različite pokazatelje o broju stanovnika općine.

Predsjedništvo Saveza je jednoglasno podržalo Inicijativu Općine Vogošća u cilju korekcije statističkih podataka o stvarnom broju stanovnika Općine Vogošća.

3. Aktivnosti Saveza na projektima:

a) Projekat „Načelnici za razvoj lokalne samouprave“

G-din Amir Kupusija informiše Predsjedništvo da su u okviru projekta „Načelnici za razvoj lokalne samouprave“ izrađeni radni materijali tri zakona i to: Zakon o finansiranju jedinica lokalne samouprave u Federaciji Bosne i Hercegovine, Zakon o međuopćinskoj saradnji i Zakon o zaštiti i spašavanju, te dvije politike: Politika lokalnog razvoja i Politika funkcionalne i fiskalne decentralizacije u Bosni i Hercegovini. Ističe da će se o urađenom informisati nadležna ministarstva, te postavlja pitanje u kom pravcu dalje djelovati.

G-din Asim Mekić naglašava da, kada se dođe do forme prijedloga ovih zakona, trebaju iznositi rješenja za njihovo poboljšanje.

G-din Rasim Omerović podsjeća da je jedan od zaključaka sa prethodne sjednice Predsjedništva Saveza bio da se u ime Saveza angažuje advokat koji bi preuzeo odgovarajuće aktivnosti s ciljem izuzimanja jedinica lokalne samouprave od otplate vanjskog duga prema Međunarodnom monetarnom fondu.

G-đa Selma Fišek upoznaje Predsjedništvo da je Stručna služba Saveza održala sastanak sa advokatom i da je isti upoznat sa ovim zaključkom Predsjedništva. Navodi da je advokat dostavio Savezu predračun u iznosu od 1.200,00 KM na ime angžmana za izradu analize propisa i mogućnosti vođenja odgovarajućeg postupka u vezi sa pitanjem izuzimanja jedinica lokalne samouprave od otplate vanjskog duga.

G-din Emir Bubalo ističe da je ispred Općine Konjic već angažovao advokata za ovu problematiku i rekao mu da se čuje sa advokatom kojeg je angažovao Savez.

G-đa Amra Babić navodi da je član 43. radnog materijala Zakona o finansiranju jedinica lokalne samouprave u Federaciji Bosne i Hercegovine prepisan iz Zakona o raspodjeli javnih prihoda, te naglašava da isti mora preživjeti radikalne izmjene.

G-din Husejin Smajlović predlaže organiziranje tematske sjednice na kojoj bi se razmotrili radni materijali navedenih zakona.

G-din Nedžad Koldžo napominje da su održane javne rasprave po općinama i da su načelnici u malom broju prisustvovali istima. Naglašava da se trebamo uozbiljiti.

G-din Edin Smajić ističe da bi trebali imati treći dom u Parlamentu kako da bi se jedinice lokalne samouprave nešto pitale. Ističe da Kanton Sarajevo dva puta plaća vanjski dug i uredno uplaćuje svoje anuitete, ali da se ne zna ko plaća a ko ne. Naglašava da je Kanton Sarajevo jedini kanton koji nema usvojen Zakon o raspodjeli javnih prihoda, te ističe da gospodin Nedžad Koldžo i on dolaze iz Kantona Sarajevo, ali da su u totalno različitoj situaciji. Naglašava da su u Kantonu Sarajevo srezani prihodi.

G-din Željko Josić ističe da je jasno da je u izradu ovih zakona i politika uložen veliki trud i da bi se Predsjedništvo Saveza trebalo odrediti šta dalje.

G-din Amir Kupusija predlaže da se ostavi još vremena do slijedeće sjednice Predsjedništva Saveza kako bi se dale primjedbe, te da se nakon toga organizira tematska sjednica o ovim zakonima.

G-din Nedžad Koldžo ističe da se treba ozbiljno prići ovim pitanjima.

G-din Ivan Vukadin naglašava da svi imaju različite kriterije i interese i da je teško pomiriti lokalne inereze kroz ove zakone. Ističe da je njegova osnovna intencija da se mora tužiti za ono što nam uzimaju.

G-dica Marina Dimova iznosi prijedlog da se i UNDP uključi u ove aktivnosti i da pomogne da se harmoniziraju predložena rješenja kada je u pitanju fond iz Radnog materijala zakona o finansiranju jedinica lokalne samouprave u Federaciji Bosne i Hercegovine i fond iz radnog materijala Zakona o razvojnem planiranju i upravljanju razvojem u Federaciji Bosne i Hercegovine.

Predsjedništvo Saveza je jednoglasno usvojilo sljedeće zaključke:

- **Radne materijale Zakona o finansiranju jedinica lokalne samouprave u Federaciji Bosne i Hercegovine, Zakona o zaštiti i spašavanju u Federaciji Bosne i Hercegovine i Zakona o međuopćinskoj saradnji poslati općinama radi davanja mišljenja i komentara;**

- U radnu grupu za Zakon o finansiranju jedinica lokalne samouprave u Federaciji Bosne i Hercegovine uključiti g-dina Emira Bubala, g-đu Amru Babić i g-dina Ljubu Grizelja (naknadno traženo);
- Održati tematsku sjednicu o gore navedenim zakonima.

b) Projekat energetska efikasnost

G-din Amir Kupusija navodi da je potrebno formirati Radnu grupu za energetska efikasnost i da bi općine do sljedeće sjednice Predsjedništva Saveza trebale predložiti kandidate za ovu radnu grupu.

Predsjedništvo Saveza je jednoglasno usvojilo zaključak da općine do naredne sjednice Predsjedništva Saveza predlože kandidate za Radnu grupu za energetska efikasnost.

c) Beacon Plus

G-din Husejin Smajlović konstatuje da je dostavljen materijal u pisanoj formi za ovu tačku.

Predsjedništvo Saveza je primilo k znanju informaciju o aktivnostima na projektu Beacon Plus.

- d) OSCE – AMCS projekat – Informacije o implementiranim aktivnostima**
- e) IFC – Projekat mikrofinansiranja u Bosni i Hercegovini**

G-din Husejin Smajlović konstatuje da je dostavljen materijal u pisanoj formi za ove tačke.

Predsjedništvo Saveza je primilo k znanju informacije o aktivnostima na projektu OSCE – AMCS i projektu IFC – Projekat mikrofinansiranja u Bosni i Hercegovini.

- f) Projekat “Podrška jačanju lokalne samouprave FBiH u pružanju efektivnijih i efikasnijih usluga” koji se implementira u saradnji sa UNDP-om:**

f 1) Projekat „Jačanje lokalne demokratije/demokracije III – LOD III“

G-đa Elvira Imširović-Bolić podsjeća prisutne da se tačka f) odnosi na projekat koji Savez implementira u partnerstvu sa UNDP-om, a koji se sastoji od tri komponente: projekta MTS, projekta ILDP i projekta LOD. U vezi sa LOD III projektom, informiše prisutne da su materijal za ovu tačku dobili u pisanoj formi. Napominje da je Savez od posljednje sjednice Predsjedništva Saveza, u skladu sa planom aktivnosti, organizirao tri regionalna sastanka za jedinice lokalne samouprave koje nisu uključene u LOD projekat. Navodi da je na sastancima prezentirana LOD metodologija, dobra praksa općina u njenoj primjeni, te su jedinice lokalne samouprave informisane da je odobrena četvrta faza LOD projekta. Skreće pažnju prisutnima da će projekat LOD IV početi sa implementacijom od 01.06.2014. godine, te da će UNDP objaviti javni poziv za jedinice lokalne samouprave da apliciraju za partnerstvo na ovom projektu. Ističe da je Savez dostavio Federalnom ministarstvu pravde (kao resornom ministarstvu) LOD metodologiju na razmatranje i eventualno usvajanje od strane Vlade Federacije BiH, a što je u skladu sa zaključcima sa sastanka koje je Savez organizirao za predstavnike federalnih ministarstava.

Informacija je primljena k znanju.

f 2) Projekat „Sistem obuke za jedinice lokalne samouprave – MTS“

G-đa Šejla Hasić ističe da su za duplo premašena očekivanja kada je u pitanju broj održanih obuka u 2013. godini te naglašava da će Savez organizirati treninge za izabrane zvaničnike i u 2014. godini.

Informacija je primljena k znanju.

f 3) „Projekat integriranog lokalnog razvoja – ILDP“

G-đa Zlata Turkić naglašava da je svim općinama poslan upitnik, da su održane radionice, dograđena web stranica Saveza, održana konferencija na kojoj je predstavljen ILDP projekat, te da je održana zajednička sjednica skupštinskih komisija Saveza.

Informacija je primljena k znanju.

g) Inicijativa za promovisanje važnosti i ključnih sadržaja principa odgovornosti, otvorenosti i čestitosti kao najvažnijih stubova dobrog upravljanja

G-din Husejin Smajlović navodi da je Razvojna agencija EDA dobra organizacija i da sa njima treba saradivati.

Predsjedništvo Saveza je usvojilo Zaključak da Stručna služba Saveza ocijeni modalitete za saradnju sa Razvojnoum agencijom EDA.

4. Pitanje statusa Grada Sarajeva u Predsjedništvu Skupštine Saveza općina i gradova Federacije BiH

G-din Husejin Smajlović navodi da su svi dobili materijale za ovu tačku.

G-din Nedžad Koldžo konstatuje da je problem to što su interesi gradskih općina i interesi Grada Sarajeva dijametralno različiti. Ističe da u Predsjedništvu Saveza mora biti zastupljen interes gradskih općina i da se ne može prihvatiti činjenica da Grad Sarajevo predstavlja te interese u Predsjedništvu Saveza. Navodi da ako Grad Sarajevo i bude član Predsjedništva Saveza, on može predstavljati samog sebe, te dodaje da od svih nadležnosti Grad Sarajevo ima samo nadležnost kod donošenja regulacionih planova, te da nemaju upravnih postupaka, dok u Općini Novo Sarajevo vode preko tri stotine upravnih postupaka u toku jedne godine.

G-din Husejin Smajlović podsjeća da se o ovome već raspravljalo na sjednici Skupštine Saveza i citira odredbu Statuta Saveza koja govori o sastavu Predsjedništva Saveza, te konstatuje da se ovo pitanje tiče Skupštine Saveza.

G-din Rasim Omerović naglašava da gradonačelnik Grada Sarajeva nikada ne prisustvuje sjednicama Predsjedništva Saveza.

Predsjedništvo Saveza je jednoglasno usvojilo slijedeće zaključke:

- **Pitanje Grada Sarajeva u Predsjedništvu Saveza općina i gradova Federacije BiH je bilo predmet razmatranja na prethodnoj sjednici Skupštine Saveza, te je ovo pitanje potrebno uputiti Skupštini Saveza na odlučivanje;**
- **Na sjednice Predsjedništva Saveza pozivati gradonačelnika Grada Sarajeva koji bi trebao lično prisustvovati istima;**
- **Grad Sarajevo, kao punopravan član Saveza općina i gradova Federacije BiH, dužan je uplaćivati članarinu Savezu.**

5. Informacije:

a) Informacija i zaključci sa Seminara na temu: “Primjena Zakona o stvarnim pravima Federacije Bosne i Hercegovine i prednacrt Zakona o premjeru i registraciji nekretnina Federacije Bosne i Hercegovine“

G-din Husejin Smajlović ističe da je za ovu tačku dostavljen materijal u pisanoj formi, te da nije potrebno dodatno obrazloženje.

Informacija i zaključci sa Seminara na temu: “Primjena Zakona o stvarnim pravima Federacije Bosne i Hercegovine i prednacrt Zakona o premjeru i registraciji nekretnina Federacije Bosne i Hercegovine“ su jednoglasno usvojeni.

b) Informacija o Zakonu o zaštiti i dobrobiti životinja

G-đa Elvira Imširović-Bolić informiše prisutne da je Savez u decembru 2012. godine Ministarstvu vanjske trgovine i ekonomskih odnosa, odnosno, Uredu za veterinarstvo Bosne i Hercegovine koji je nadležan za ovu problematiku, uputio Urgenciju u vezi sa izmjenama i dopunama Zakona o zaštiti i dobrobiti životinja. U vezi sa navedenom Urgencijom, Ministarstvo je dostavilo odgovor da se na listi prioriteta za 2013. godinu neće naći ovaj zakon. Navodi da je Savez istovremeno uputio žalbu Instituciji ombudsmena za ljudska prava Bosne i Hercegovine, te da je na njihovo insistiranje, Ured za veterinarstvo BiH u novembru mjesecu 2013. godine dostavio Instituciji ombudsmena za ljudska prava BiH informaciju da se Prijedlog zakona o izmjenama i dopunama Zakona o zaštiti i dobrobiti životinja (u daljem tekstu: Prijedlog zakona), čiji je predlagatelj zastupnica Nermina Zaimović-Uzunović, nalazi u proceduri donošenja u Parlamentu Bosne i Hercegovine. U informaciji je navedeno da je Prijedlog zakona prošao u prvom čitanju Zastupničkog doma. Ističe da je nakon toga Institucija ombudsmena za ljudska prava Bosne i Hercegovine Savezu dostavila Odluku o zatvaranju ovog predmeta. Tragom naprijed spomenutih informacija, a u vezi sa pripremom ove sjednice Predsjedništva Saveza, Savez je kontaktirao Zastupnički dom Parlamentarne skupštine BiH koji nas je informisao da je na njihovom domu Prijedlog zakona prošao u drugom čitanju, te da je upućen Domu naroda na dalje postupanje. Ističe da je Savez kontaktirao Dom naroda Parlamentarne skupštine BiH koji nam je dao informaciju da se o Prijedlogu zakona još nije raspravljalo. Nakon toga smo obaviješteni od Doma naroda da su nam dali pogrešnu informaciju, te da će se o Prijedlogu zakona raspravljati narednog dana na 36. sjednici Doma naroda pod tačkom 6. Također su nas informisali da je Ustavnopravna komisija Doma naroda dala negativno mišljenje na Prijedlog zakona, te predložila zaključak da se zaduži Vijeće ministara BiH da u što kraćem roku pristupi izradi kvalitetnijeg prijedloga zakona i dostavi ga u parlamentarnu proceduru. Konstatuje da bi se u tom slučaju cijeli proces rješavanja ove problematike jako prolongirao. S obzirom na činjenicu da je Savez ovu informaciju dobio u poslijepodnevnim satima, Stručna služba Saveza je kontaktirala sekretara Općine Zenica koji je u stalnom kontaktu sa zastupnicom Nerminom Zaimović-Uzunović po ovom pitanju, kao i određeni broj načelnika koji su u proteklom periodu bili jako uključeni u ovu problematiku, s ciljem lobiranja delegata po ovom pitanju. Dalje navodi da zakazana sjednica Doma naroda Parlamentarne skupštine BiH nije održana zbog nedostatka kvoruma, te da je zakazan nastavak te sjednice za prekosutra, tj. 06.02.2014. godine. Prisutne obavještava ko su članovi Ustavnopravne komisije koja je dala negativno mišljenje na Prijedlog zakona.

Informacija je primljena k znanju. Nakon konstatacije da je ovaj zakon izuzetno bitan za jedinice lokalne samouprave, Predsjedništvo Saveza je usvojilo slijedeće zaključke:

- **Savez općina i gradova Federacije Bosne i Hercegovine, kao zakonski zastupnik svojih članica pred višim nivoima vlasti, ostaje pri svojim ranijim stavovima po ovom pitanju;**

- Savez općina i gradova Federacije Bosne i Hercegovine podržava Prijedlog zakona o izmjenama i dopunama Zakona o zaštiti i dobrobiti životinja, čiji je predlagач Predstavnički dom Parlamentarne skupštine BiH;
- Savez općina i gradova Federacije Bosne i Hercegovine izražava zabrinutost Mišljenjem Ustavnopravne komisije Doma naroda broj: 02/1-50-8-22-36/13 od 30.12.2013. godine, te isto smatra neprihvatljivim iz razloga što se prolongira rješavanje ovog izuzetno važnog pitanja koje se tiče sigurnosti građana.
- Savez općina i gradova Federacije Bosne i Hercegovine dostaviti Urgenciju za pružanje podrške Prijedlogu zakona o izmjenama i dopunama Zakona o zaštiti i dobrobiti životinja svim delegatima Doma naroda Parlamentarne skupštine Bosne i Hercegovine, te nastaviti sa tom praksom i u budućnosti.

c) Informacija o naprednom međunarodnom treningu posvećenom izgradnji kapaciteta žena političarki na lokalnom nivou

G-đa Selma Fišek ukratko informiše Predsjedništvo Saveza o ovoj tački i navodi da je Savez općina i gradova Federacije BiH uputio poziv i aplikacione formulare za međunarodni trening posvećen izgradnji kapaciteta žena političarki na lokalnom nivou kojeg organizuje Centar za lokalnu demokratiju (ICLD) u saradnji sa Švedskom međunarodnom razvojnom agencijom (SIDA). Ističe da je ovaj seminar namjenjen izabranim zvaničnicama - ženama (načelnicama i vjećnicama) u jedinicama lokalne samouprave.

G-đa Amra Babić navodi da je učestvovala na ovom treningu prošle godine i naglašava da je bilo vrlo interesantno posebno iz oblasti menadžmenta. Smatra da je ova edukacija mnogo korisnija za žene iz izvršne nego za one iz zakonodavne vlasti.

G-din Ivan Vukadin smatra da je ovo diskriminirajuće i postavlja pitanje zašto edukacija samo za žene. Ističe da bi njegovi pomoćnici također trebali imati edukaciju.

Informacija je primljena k znanju.

6. Inicijativa za izmjenu Zakona o električnoj energiji

Predsjedništvo Saveza je usvojilo slijedeće zaključke:

- Stručna služba Saveza i Radna grupa za energetska efikasnost, čiji će se članovi imenovati na slijedećoj sjednici Predsjedništva Saveza, sa gospodinom Emirom Bubalom, pripremiti primjedbe na Zakon o električnoj energiji;
- Ukoliko se nadležni organi ne oglase povodom istih, pokrenuti aktivnosti prema Ustavnom sudu Federacije Bosne i Hercegovine.

7. Inicijativa za izmjene i dopune Zakona o plaćama i naknadama u organima vlasti Federacije Bosne i Hercegovine

G-din Nedžad Koldžo ističe da u Zakonu o plaćama i naknadama u organima vlasti Federacije Bosne i Hercegovine u dijelu koji se odnosi na platne razrede i koeficijente za izabrane funkcionere, nosioce izvršnih funkcija i izabrane zvaničnike nisu utvrđene razlike u platnim razredima i koeficijentima za nosioce funkcija zakonodavne i izvršne vlasti različitih nivoa vlasti koje poznaje naš ustavni i zakonodavno-pravni sistem.

Predsjedništvo Saveza je usvojilo zaključak da Inicijativu za izmjene i dopune Zakona o plaćama i naknadama u organima vlasti Federacije Bosne i Hercegovine razmotri Komisija za ustavna i zakonodavna pitanja te da do slijedeće sjednice Predsjedništva pripremi svoj prijedlog.

8. Tekuća pitanja

a) Aktivnosti s ciljem predstavljanja BiH uoči preuzimanja njenog predsjedavanja Komitetom ministara Vijeća Evrope početkom 2015. godine

G-đa Vesna Travljanin informiše Predsjedništvo da je ova inicijativa potekla od gospodina Semira Efendića i gospodina Ljube Bešlića, koji su članovi Delegacije Bosne i Hercegovine pri Kongresu lokalnih i regionalnih vlasti Vijeća Evrope, te da se radi o uključenju Saveza u realizaciju ovog projekta kroz koordinaciju aktivnosti između lokalnih zajednica i između lokalnih zajednica i Delegacije Bosne i Hercegovine pri Kongresu lokalnih i regionalnih vlasti Vijeća Evrope, a s ciljem predstavljanja Bosne i Hercegovine kroz njene turističke, industrijske i privredne resurse.

Predsjedništvo Saveza je primilo k znanju informaciju i podržalo ovu inicijativu.

b) Generalna skupština NALAS –a

G-đa Vesna Travljanin navodi da će se Skupština NALAS-a održati u aprilu mjesecu 2014. godine u Sarajevu. Ističe da je Nexpo sajam održan u Sarajevu.

G-din Ivan Vukadin naglašava da je na slijedećoj sjednici Predsjedništva potrebno odrediti predstavnika Saveza u Skupštini NALAS-a umjesto gospodina Bege Birparića. Ističe da je Nexpo sajam u Sarajevu bio jako dobra prezentacija Bosne i Hercegovine.

G-din Asim Mekić predlaže gospodina Nedžada Koldžu za predstavnika Saveza u Skupštini NALAS-a.

Predsjedništvo Saveza je primilo k znanju ovu informaciju, te je zadužilo Stručnu službu Saveza da do slijedeće sjednice Predsjedništva Saveza pripremi prijedlog kandidata za predstavnika Saveza u Skupštini NALAS-a.

G-din Ivan Vukadin informiše da je došlo do grubog kršenja Statuta kad su pitanju izbori članova mjesnih zajednica u Općini Tuzli, te da smo zamoljeni da kroz Savez pokrenemo ovo pitanje. Dalje navodi da je ovaj problem u međuvremenu riješen.

G-đa Selma Fišek ističe da je Federalno ministarstvo finansija tražilo od Saveza da imenuje osobu za člana Arbitražnog tijela, a po osnovu usvojene Odluke o budžetu Općine Velika Kladaša za 2014. godinu.

G-din Husejin Smajlović predlaže da to bude neko od članova Komisije za ekonomski razvoj općina i gradova i finansije.

Predsjedništvo Saveza je usvojilo zaključak da se za člana Arbitražnog tijela po osnovu usvojene Odluke o budžetu Općine Velika Kladaša za 2014. godinu, ispred Saveza imenuje neko od članova Komisije za ekonomski razvoj općina i gradova i finansije.

G-đa Selma Fišek moli da se članovi Predsjedništva izjasne da li podržavaju nastavak aktivnosti po pitanju Inicijative Saveza za izuzimanje jedinica lokalne samouprave od otplate vanjskog duga prema Međunarodnom monetarnom fondu.

Predsjedništvo Saveza je podržalo nastavak aktivnosti Saveza po pitanju izuzimanja jedinica lokalne samouprave od otplate vanjskog duga Bosne i Hercegovine prema Međunarodnom monetarnom fondu.

Nakon što je konstatovano da su sve tačke Dnevnog reda iscrpljene, g-din Husejin Smajlović zatvara Četvrtu sjednicu Predsjedništva Saveza u 14:30 sati.

Predsjednik Predsjedništva Skupštine Saveza
Husejin Smajlović, s.r.